



淮南子卷六

天文訓下

漢劉向校定許慎記上明毘陵後學吳律校刊

淮南元年冬太一在丙子冬至甲午立春丙子二
陰一陽成氣二二陽一陰成氣三合氣而為音合
陰而為陽合陽而為律故曰五音六律音自倍而
為日律自倍而為辰故日十而辰十二月日行十
三度七十六分度之二十六二十九日九百四十
分日之四百九十九而為月而以十二月為歲歲
有餘十日九百四十分日之八百二十七故十九

歲而七閏日冬至子午夏至卯酉冬至加三日則
夏至之日也歲遷六日終而復始壬午冬至甲子
受制木用事火烟青七十二日丙子受制火用事
火烟赤七十二日戊子受制土用事火烟黃七十
二日庚子受制金用事火烟白七十二日壬子受
制水用事火烟黑七十二日而歲終庚子受制歲
遷六日以數推之七十歲而復至甲子甲子受制
則行柔惠挺郡禁開闔扇通障塞毋伐木丙子受
制則舉賢良賞有功立封侯出貨財戊子受制則
養老鰥寡行糴鬻施恩澤庚子受制則繕牆垣脩

城郭審郡禁飾兵甲儆百官誅不法壬子受制則
閉門閭大搜客斷罰刑殺當罪息關梁禁外徙甲
子氣燥濁丙子氣燥陽戊子氣溼濁庚子氣燥寒
壬子氣清寒丙子干甲子蟄虫早出故雷早行戊
子干甲子胎夭郊鳥虫多傷庚子干甲子有兵壬
子干甲子春有霜戊子干丙子霆庚子干丙子夷
壬子干丙子雹甲子干丙子地動庚子干戊子五
穀有殃壬子干戊子夏寒雨霜甲子干戊子介虫
不爲丙子干戊子大旱菰封燠壬子干庚子大剛
魚不爲甲子干庚子草木再死再生丙子干庚子

草木復榮戊子干庚子歲或存或亡甲子干壬子
乃不藏丙子干壬子星墜戊子干壬子蟄虫冬出
其鄉庚子干壬子冬雷其鄉季春三月豐隆乃出
以將其兩至秋三月地氣下藏乃收其殺百虫蟄
伏靜居閉戶青女乃出以降霜雪行十二時之氣
以至於仲春二月之夕乃收其藏而閉其寒女夷
鼓歌以司天和以長百穀禽鳥草木孟夏之月以
熟穀禾雉鳩長鳴爲帝侯歲是故天不發其陰則
萬物不生地不發其陽則萬物不成天圓地方道
在中央日爲德月爲刑月歸而萬物死日至而萬

物生遠山則山氣藏遠水則水虫蟄遠木則木葉
槁日五日不見失其位也聖人不與也日出於暘
谷浴于咸池拂于扶桑是謂晨明登于扶桑爰始
將行是謂朏明至于曲阿是謂旦明至于魯泉是
謂蚤食至于桑野是謂晏食至于衡陽是謂隅中
至于昆吾是謂正中至于鳥次是謂小還至于悲
谷是謂鋪時至于女紀是謂大還至于淵虞是謂
高春至于連石是謂下春至于悲泉爰止其女爰
息其馬是謂縣車至于虞淵是謂黃昏至于蒙谷
是謂定昏日入於虞淵之汜曙於蒙谷之浦行九

州七舍有五億萬七千三百九里禹以爲朝晝昏
夜夏日至則陰乘陽是以萬物就而死冬日至則
陽乘陰是以萬物仰而生晝者陽之分夜者陰之
分是以陽氣勝則日脩而夜短陰氣勝則日短而
夜脩道曰規始於一一而不生故分而爲陰陽陰
陽合和而萬物生故曰一生二二生三三生萬物
天地三月而爲一時故祭祀三飯以爲禮喪紀三
踊以爲節兵重三罕以爲制以三參物三三如九
故黃鍾之律九寸而宮音調因而九之九九八十
一故黃鍾之數立焉黃者土德之色鍾者氣之所

種也日冬至德氣爲土土色黃故曰黃鍾律之數
六分爲雌雄故曰十二鍾以副十二月十二月十二各以
三成故置一而十一三之爲積分十七萬七千一
百四十七黃鍾大數立焉凡十二律黃鍾爲宮大
簇爲商姑洗爲角林鍾爲徵南呂爲羽物以三成
音以五立三與五入八故卯生者八竅律之初生
也寫鳳之音故音以八生黃鍾爲宮宮者音之君
也故黃鍾位子其數八十一主十一月下生林鍾
林鍾之數五十四主六月上生太簇太簇之數七
十二主正月下生南呂南呂之數四十八主八月

上生姑洗姑洗之數六十四主三月下生應鍾應
鍾之數四十二主十月上生蕤賓蕤賓之數五十
七主五月上生大呂大呂之數七十六主十二月
下生夷則夷則之數五十一主七月上生夾鍾夾
鍾之數六十八主二月下生無射無射之數四十
五主九月上生仲呂仲呂之數六十主四月極不
生徵生宮宮生商商生羽羽生角角生姑洗姑洗
生應鍾比於正音故爲和應鍾生蕤賓不比正音
故爲繆日冬至音比林鍾浸以濁日夏至音比黃
鍾浸以清以十二律應二十四時之變甲子仲呂

之徵也丙子夾鍾之羽也戊子黃鍾之宮也庚子
無射之商也壬子夷則之角也古之爲度量輕重
生乎天道黃鍾之律脩九寸物以三生三九二十
七故幅廣二尺七寸音以八相生故人脩八尺尋
自倍故八尺而爲尋有形則有聲音之數五以五
乘八五八四十故四丈而爲匹匹者中人之度也
一匹而爲制秋分蓂定蓂定而禾熟律之數十二
故十二葉而當一粟十二粟而當一寸律以當辰
音以當日日之數十故十寸而爲尺十尺而爲丈
其以爲量十二粟而當一分十二分而當一銖十

二銖而當半兩衡有左右因倍之故一十四銖為一兩天有四時以成一歲因而四之四四十六故十六兩而為一斤三月而為一時三十日為一月故三十斤為一鈞四時而為一歲故四鈞為一石其以為音也一律而生五音十二律而為六十音因而六之六六三十六故三百六十音以當一歲之日故律歷之數天地之道也下生者倍以三除之上生者四以三除之太陰元始建子甲寅一終而建甲戌二終而建甲午三終而復得甲寅之元歲從一辰立春之後得其辰而遷其所順前三後

五百事可舉太陰所建蟄虫首穴而處鵲巢鄉而為戶太陰在寅朱鳥在卯勾陳在子玄武在戌白虎在酉蒼龍在辰寅為建卯為除辰為滿巳為平主生午為定未為執主陷申為破主衡酉為危主杓戌為成主少德亥為收主大德子為開主大歲丑為閉主太陰太陰在寅歲名曰攝提格其碓為歲星舍斗牽牛以十一月與之晨出東方東井輿鬼為對太陰在卯歲名曰單闕歲星舍須女虛危以十二月與之晨出東方柳七星張為對太陰在辰歲名曰執除歲星舍營室東壁以正月與之晨

出東方翼軫爲對太陰在巳歲名曰大荒落歲星
舍奎婁以二月與之晨出東方角亢爲對太陰在
午歲名曰敦牂歲星舍胃昴畢以三月與之晨出
東方氐房心爲對太陰在未歲名曰協洽歲星舍
觜雋參以四月與之晨出東方尾箕爲對太陰在
申歲名曰涇灘歲星舍東井輿鬼以五月與之晨
出東方斗牽牛爲對太陰在酉歲名曰作鄂歲星
舍柳七星張以六月與之晨出東方須女虛危爲
對太陰在戌歲名曰闍茂歲星舍翼軫以七月與
之晨出東方營室東壁爲對太陰在亥歲名曰大

淵獻歲星舍角亢以八月與之晨出東方奎婁爲
對太陰在子歲名曰困敦歲星舍氐房心以九月
與之晨出東方胃昴畢爲對太陰在丑歲名曰赤
奮若歲星舍尾箕以十月與之晨出東方觜雋參
爲對太陰在甲子刑德合東方宮常徙所不勝合
四歲而離離十六歲而復合所以離者刑不得入
中宮而徙於木太陰所居曰德辰爲刑德綱曰自
倍因柔曰徙所不勝刑水辰之木木辰之水金火
立其處凡徙諸神朱鳥在太陰前一鈎陳在後三
玄武在前五白虎在後六虛星乘鈎陳而天地襲

矣凡曰甲剛乙柔丙剛丁柔以至於癸木生於亥
壯於卯死於未三辰皆木也火生於寅壯於午死
於戌三辰皆火也土生於午壯於戌死於寅三辰
皆土也金生於巳壯於酉死於丑三辰皆金也水
生於申壯於子死於辰三辰皆水也故五勝生一
壯五終九五九四十五故神四十五日而一徙以
三應五八徙而歲終凡用太陰左前刑右背德擊
鈎陳之衡辰以戰必勝以攻必尅欲知天道以日
爲主六月當心左周而行分而爲十二月與日相
當天地重襲後必無殃星正月建營室二月建奎

婁三月建胃四月建畢五月建東井六月建張七
月建翼八月建亢九月建房十月建尾十一月建
牽牛十二月建虛星分度角十二亢九氏十五房
五心五尾十八箕十一四分一斗二十六牽牛八
須文十二虛十危十七營室十六東壁九奎十六
婁十二胃十四昴十一畢十六觜雉二參九東井
三十三輿鬼四柳十五星七張翼各十八軫十七
凡二十八宿也星部地名角亢鄭氏房心宋尾箕
燕斗牽牛越須女吳虛危齊營室東壁衛奎婁魯
胃昴畢魏觜雉參趙東井輿鬼秦柳七星張周翼

軫楚歲星之所居五穀豐昌其對爲衡歲乃有殃
當居而不居越而之他處主死亡國太陰治春則
欲行柔惠溫涼太陰治夏則欲布施宣明太陰治
秋則欲脩備繕兵太陰治冬則欲猛毅剛強三歲
而改節六歲而易常故三歲而一饑六歲而一衰
十二歲而一康甲齊乙東夷丙楚丁南夷戊魏己
韓庚秦辛西夷壬衛癸越子周丑翟寅楚卯鄭辰
晉巳衛午秦未宋申齊酉魯戌趙亥燕甲乙寅卯
木也丙丁巳午火也戊己四季土也庚辛申酉金
也壬癸亥子水也水生木木生火火生土土生金

余生水子生母曰義母生子曰保子母相得曰專
毋勝子曰制子勝母曰困以擊殺勝而無報以專
從事專而有功以義行理名立而不墮以保蓄養
萬物蕃昌以困舉事破滅死亡北斗之神有雌雄
十一月始建於子月從一辰雄左行雌右行五月
合午謀刑十一月合子謀德太陰所居辰爲馱日
馱日不可以舉百事堪輿徐行雄以奇知雌故爲
奇辰數從甲子始子母相求所合之處爲合十日
十二辰周六十日凡八合合於歲前則死亡合於
歲後則無殃甲戌燕也乙酉齊也丙午越也丁巳

楚也庚申壽也辛卯戎也壬子也癸亥胡也戊戌巳亥韓也巳酉巳卯魏也戊午戊子八合天下也太陰小歲星日辰五神皆合其日有雲氣風雨國君當之天神之貴者莫貴於青龍或曰天一或曰太陰太陰所居不可背而可鄉北斗所擊不可與敵天地以設分而爲陰陽陽生於陰陰生於陽陰陽相錯四維乃通或死或生萬物乃成歧行喙息莫貴於人孔竅肢體皆通於天天有九重人亦有九竅天有四時以制十二月人亦有四肢以使十二節天有十二月以制三百六十日人亦有十

二肢以使三百六十節故舉事而不順天者逆其生者也以日冬至數來歲正月朔日五十日者民食足不滿五十日日減一斗有餘日日益一升有其歲司也帝張四維運之以斗月徙一神復反其所正月指寅十二月指丑一歲而匝終而復始指寅則萬物蟄律受太簇太簇者簇而未出也指卯卯則茂然律受夾鍾夾鍾者種始莢也指辰辰則振之也律受姑洗姑洗者陳去而新來也指巳巳則生已定也律受仲呂仲呂者中克大也指午午者忤也律受蕤賓蕤賓者安而服也指未未昧

也律受林鍾林鍾者引而止也指申申者呻之也
 律受夷則夷則者易其則也德以去矣指酉酉者
 飽也律受南呂南呂者任包大也指戌戌者滅也
 律受無射無射者入無馱也指亥亥者闕也律受
 應鍾應鍾者應其鍾也指子子者茲也律受黃鍾
 黃鍾者鍾已黃也指丑丑者紐也律受大呂大呂
 者旅旅而去也其加卯酉則陰陽分日夜平矣故
 曰規生矩殺衡長權藏繩居中央為四時根



攝提格之歲歲早水晚旱稻疾蠶不登菽麥昌民
食四升寅在甲曰闕蓬單闕之歲歲和稻菽麥蠶
昌民食五升卯在乙曰旃蒙執徐之歲歲早早晚
水小饑蠶閉麥熟民食三升辰在丙曰柔兆大荒
落之歲歲有小兵蠶小登麥昌菽疾民食二升巳
在丁曰強圉敦牂之歲歲大旱蠶登稻疾菽麥昌
禾不爲民食二升午在戊曰著雝協洽之歲歲有
小兵蠶登稻昌菽麥不爲民食三升未在巳曰屠
維涿灘之歲歲和小雨行蠶登菽麥昌民食三升
申在庚曰上章作鄂之歲歲有大兵民疾蠶不登

菽麥不爲禾蟲民食五升酉在辛曰重光掩茂之
歲歲小饑有兵蠶不登麥不爲昌民食七升戌在
壬曰玄默大淵獻之歲歲有大兵大饑蠶開菽麥
不爲禾蟲民食三升困敦之歲歲大霧起大水出
蠶稻菽麥昌民食三斗子在癸曰昭陽赤奮若之
歲歲有小兵早水蠶不出稻疾菽不爲麥昌民食
一斗正朝夕先樹一表東方操一表却去前表十
步以參望日始出北廉日直入又樹一表於東方
因西方之表以參望日入北廉則定東方兩表之
中與西方之表則東西之正也日冬至日出東南

維入西南維至春秋分日出東中入西中夏至出東北維入東北維至則正南欲知東西南北廣度之數者立四表以爲方一里距先春分若秋分十餘日從距北表參望日始出及旦以候相應相應則此與日直也輒以南表參望之以入前表數爲法除舉廣除立表度以知從此東西之數也假使視日出入前表中一寸是寸得一里也一里積萬八千寸得從此東萬八千里視日方入前表半寸則半寸得一里半寸而除一里積寸得二萬六千里除則從此西里數也并之東西里數也則極

徑也未春分而直已秋分而不直此處南也未秋分而直已春分而不直此處北也分至而直此處南北中也從中處欲知中南也未秋分而不直此處南北中也從中處欲知南北極遠近從西南表參望日日夏至始出與北表參則是東與東北表等也正東萬八千里則從中北亦萬八千里也倍之南北之里數也其不從中之數也以出入前表之數益損之表入一寸寸減日近一里表出一寸寸益遠一里欲知天之高樹表高一丈正南北相去千里同日度其陰北表二尺南表尺九寸是南

千里陰短寸南二萬里則無景是直日下也陰二
此而得高一丈者南一而高五也則置從此南至
日下里數因而五之爲十萬里則天高也若使京
與表等則高與遠等也

淮南子卷六

淮南子卷七

漢劉向校定許慎記上明昆陵後學吳仲校刊

地形訓上

地形之所載六合之間四極之內照之以日月經
之以星辰紀之以四時要之以太歲天地之間九
州八極土有九山山有九塞澤有九藪風有八等
水有六品何謂九州東南神州曰農土正南次州
曰沃土西南戎州曰滔土正西弇州曰并土正中
冀州曰中土西北台州曰肥土正北濟州曰成土
東北薄州曰隱土正東陽州曰申土何謂九山會

稽泰山王屋首山大華岐山太行羊腸孟門何謂
九塞曰太汾澠阨荆阮方城穀阪井陘令庇句注
居庸何謂九藪曰越之具區楚之雲夢秦之陽紆
晉之大陸鄭之圃田宋之孟諸齊之海隅趙之鉅
鹿燕之昭余何謂八風東北曰炎風東風曰條風
東南曰景風南方曰巨風西南曰涼風西方曰飈
風西北曰麗風北方曰寒風何謂六水曰河水赤
水遼水黑水江水淮水合四海之內東西二萬八
千里南北二萬六千里水道八千里通谷其名川
六百陸經三千里禹乃使太章步自東極至于西

極二億三萬三千五百里七十五步使豎亥步自
北極至於南極二億三萬三千五百里七十五步
凡鴻水淵藪自三百以上二億三萬三千五百五
十里有九淵禹乃以息土填洪水以爲名山掘崑
崙虛以下地中有增城九重其高萬一千里百一
十四步二尺六寸上有木禾其脩五尋珠樹玉樹
璇樹不死樹在其西沙棠瑯玕在其東絳樹在其
南碧樹瑤樹在其北旁有四百四十門門間四里
里間九純純丈五尺旁有九井王橫維其西北之
隅北門開以內不周之風傾宮旋室縣圃涼風樊

桐在崑崙閭闔之中是其䟽圃䟽圃之池浸之黃
泉水黃水三周復其原是謂丹水飲之不死河水
出崑崙東北陬貫渤海八禹所導積石山赤水出
其東南陬西南注南海丹澤之東赤水之東弱水
出自窮石至於合黎餘波入於流沙絕流沙南至
南海洋水出其西北陬入於南海羽民之南凡四
水者帝之神泉以和百藥以潤萬物崑崙之丘或
上倍之是謂涼風之上登之而不死或上倍之是
謂懸圃登之乃靈能使風雨或上倍之乃維上帝
登之乃神是謂大帝之居扶木在陽州日之所曠

建木在都廣衆帝所自上下日中無景呼而無響
蓋天地之中也若木在建木西未有十日其華照
下地九州之大繩方千里九州之外乃有八殞亦
方千里自東北方曰大澤曰無通東方曰大渚曰
少海東南方曰具區曰無澤南方曰大夢曰浩澤
西南方曰渚資曰丹澤西方曰九區曰泉澤西北
方曰大夏曰海澤北方曰大冥曰寒澤凡八殞八
澤之雲是雨九州八殞之外迺有八紘亦方千里
自東北方曰和丘曰荒土東方曰棘林曰桑野東
南方曰大窮曰衆女南方曰都廣曰反戶西南方

曰焦僥曰炎土西方曰金丘曰沃野西北方曰一目曰沙所北方曰積冰曰委羽凡八絃之氣是出寒暑以合八正必以風雨八絃之外乃有八極自東北方曰方土之山曰蒼門東方曰東極之山曰開明之門東南方曰波母之山曰陽門南方曰南極之山曰暑門西南方曰編駒之山曰白門西方曰西極之山曰閻闔之門西北方曰不周之山曰幽都之門北方曰北極之山曰寒門凡八極之雲是雨天下八門之風是節寒暑八絃八黃八澤之雲以雨九州而和中土東方之美者有醫母閭之

珣玕琪焉東南方之美者有會稽之竹焉箭焉南方之美者有梁山之犀象焉西南方之美者有華山之金石焉西方之美者有霍山之珠玉焉西北方之美者有崑崙虛之球琳瑯玕焉北方之美者有幽都之筋角焉東北方之美者有斥山之文皮焉中央之美者有岱岳以生五穀桑麻魚蠶出焉凡地形東西為緯南北為經山為積德川為積刑高者為生下者為死丘陵為牡谿谷為牝水圓折者有珠方折者有玉清水有黃金龍淵有玉英土地各以其類生是故山氣多男澤氣多女障氣多

暗風氣多聾林氣多癰木氣多偃岸下氣多腫石
氣多力險阻氣多瘦暑氣多天寒氣多壽谷氣多
痺丘氣多征衍氣多仁陵氣多貪輕土多利重土
多遲清水音小濁水音大湍水人輕遲水人重中
土多聖人皆象其氣皆應其類故南方有不死之
草北方有不釋之冰東方有君子之國西方有刑
殘之尸寢居直夢人死爲鬼磁石上飛雲母來水
土龍致兩燕鴈代飛蛤蟹珠龜與月盛衰是故堅
土人剛弱土人肥墟土人大沙土人細息土人美
耗土人醜食水者善游能寒食土者無心而慧食

木者多力而糞食草者善走而愚食葉者有絲而
蛾食肉者勇敢而悍食氣者神明而壽食穀者知
慧而夭不食者不死而神凡人民禽獸萬物貞蟲
各有以生或竒或偶或飛或走莫知其精惟知通
道者能原本之

天一地二人三三三而九九九八十一一主日日
數十日主人人故十月而生八九七十二二主偶
偶以承竒竒主辰辰主月月主馬馬故十二月而
生七九六十三三主斗斗主犬犬故三月而生六
九五十四四主時時主彘彘故四月而生五九四

十五五主音音主猿猿故五月而生四九三十六
六主律律主麋鹿麋鹿故六月而生三九二十七
七主星星主虎虎故七月而生二九一十八八主
風風主蟲蟲故八月而化鳥魚皆生於陰陰屬於
陽故鳥魚皆卵生魚游於水鳥飛於雲故立冬燕
雀入海化爲蛤萬物之生而各異類蚕食而不飲
蟬飲而不食蟬不飲不食介鱗者夏食而冬蟄
齧吞者八竅而卵生嚼咽者九竅而胎生四足者
無羽翼戴角者無上齒無角者膏而無前有角者
脂而無後畫生者類父夜生者似母至陰生牝至

陽生牡夫熊羆蟄藏飛鳥時移是故白水宜玉黑
水宜砥青水宜碧赤水宜丹黃水宜金清水宜龜
汾水濛濁而宜麻濟水通和而宜麥河水中濁而
宜菽雝水輕利而宜禾渭水多力而宜黍漢水重
安而宜竹江水肥仁而宜稻平土之人慧而宜五
穀

淮南子卷七

淮南子卷八

漢劉向校定許慎記上明毘陵後學吳仲校刊

地形訓下

東方川谷之所注日月之所出其人兌形小頭隆
鼻大口鵠肩企行竅通於目筋氣屬焉蒼色主肝
長大早知而不壽其地宜麥多虎豹南方陽氣之
所積暑濕居之其人脩形大口決眦竅通於
耳血脉屬焉赤色主心早壯而夭其地宜稻多兕
象西方高土川谷出焉日月入焉其人面末僂脩
頸印行竅通於鼻皮革屬焉白色主肺勇敢不仁

其地宜黍多旄犀北方幽晦不明天之所閉也寒
水之所積也蟄虫之所伏也其人翁形短頸大肩
下尻竅通於陰骨幹屬焉黑色主胃其人蠢愚禽
獸而壽其地宜菽多犬馬中央四達風氣之所通
雨露之所會也其人大面短頤美鬚惡肥竅通於
口膚肉屬焉黃色主胃慧聖而好治其地宜禾多
牛羊及六畜

木勝土土勝水水勝火火勝金金勝木故禾春生
秋死菽夏生冬死麥秋生夏死薺冬生中夏死木
壯水老火生金囚土死火壯木老土生水囚金死

土壯火老金生木囚水死金壯土老水生火囚木
死水壯金老木生土囚火死音有五聲宮其主也
色有五章黃其主也味有五變甘其主也位有五
材土其主也是故鍊土生木鍊木生火鍊火生雲
鍊雲生水鍊水反土鍊甘生酸鍊酸生辛鍊辛生
苦鍊苦生醎鍊醎生甘變宮生徵變徵生商變商
生羽變羽生角變角生宮是故以水和土以土和
火以火化金以金治水木復反土五行相治所以
成器用

凡海外三十六國自西北至西南方有脩股民天

民肅慎民白民決民女子民丈夫民竒股民一臂
民三身民自西南至東南方結曾民謹頭國民裸
國民三苗民交股民不死民穿曾民反舌民豕喙
民鑿齒民三頭民脩臂民自東南至東北方有大
人國君子國黑齒民玄股民毛民勞民自東北至
西北方有跂踵民句嬰民深目民無腸民柔利民
一目民無繼民維棠武人在西北陬碓魚在其南
有神二人連臂爲帝候夜在其西南方三株樹在
其東北方有玉樹在赤水之上崑崙華立在其東
南方爰有遺玉青鳥視肉楊桃其墟甘華百果所

出和丘在其東北陬三桑無枝在其西夸父眈耳
在其北方夸父棄其策是爲鄧林昆吾立在其南方
軒轅立在其西方巫咸在其北方立登保之山暘谷
搏桑在東方有娥在不周之北長女簡翟少女建
庇西王母在流沙之瀕樂民拏閭在崑崙弱水之
洲三危在樂民西宵明燭光在河洲所照方千里
龍門在河淵湍池在崑崙玄燿不周申池在海隅
孟諸在沛少室太室在冀州燭龍在鴈門北蔽干
委羽之山不見日其神人面龍身而無足后稷壠
在建木西其人死復蘇其半魚在其間流黃沃民

在其北方三百里狗國在其東雷澤有神龍身人頭鼓其腹而熙

江出岷山東流絕漢入海左還北流至于開母之北右還東流至於東極河出積石睢出荆山淮出桐栢山睢出羽山清漳出楊戾濁漳出發包濟出王屋時泗沂出臺台術洛出獵山汝出弗其流合於濟漢出擘豕涇出薄落之山渭出鳥鼠同穴伊出上魏雒出熊耳浚出華竅雒出覆舟汾出燕京衽出瀆熊溜出目飴丹水出高褚股出嶠山鎬出鮮于涼出茅盧石梁汝出猛山淇出大號晉出龍

山結給台出封羊遼出砥石釜出景岐出石橋呼池出魯平泥塗淵出楸山維濕北流出於燕

諸嵒攝提條風之所生也通視明庶風之所生也赤奮若清明風之所生也共工景風之所生也諸比涼風之所生也臯稽閭闔風之所生也隅強不周風之所生也窮竒廣莫風之所生也

窾生海人海人生若菌若茵生聖人聖人生庶人凡窾者生於庶人羽嘉生飛龍飛龍生鳳凰鳳凰生鸞鳥鸞鳥生庶鳥凡羽者生於庶鳥毛犢生應龍應龍生建馬建馬生麒麟麒麟生庶獸凡毛者

生於度獸介鱗生蛟龍蛟龍生鯤鯁鯁生建邪
建邪生度魚凡鱗者生於度魚介潭生先龍先龍
生玄龜玄龜生靈龜靈龜生度龜凡介者生於度
龜煖濕生窠煖濕生於毛風毛風生於濕玄濕玄
生羽風羽風生煖介煖介生鱗薄鱗薄生煖介五
類雜種興乎外肖形而蕃日馮生陽闕陽闕生喬
如喬如生幹木幹木生度木凡根拔木者生於度
木根拔生程若程若生玄玉玄玉生醴泉醴泉生
皇辜皇辜生度草凡根拔草者生於度草海間生
屈龍屈龍生容華容華生藁藁生萍藻萍藻生浮
草凡浮生不根芟者生於萍藻

正土之氣也御乎埃天五百歲生缺缺五百歲生
黃埃黃埃五百歲生黃頌黃頌五百歲生黃金黃
金千歲生黃龍黃龍入藏生黃泉黃泉之埃上爲
黃雲陰陽相薄爲雷激揚爲電上者就下流水就
通而合于黃海偏土之氣御乎清天清天八百歲
生青魯青魯八百歲生青頌青頌八百歲生青金
青金八百歲生青龍青龍入藏生清泉清泉之埃
上爲青雲陰陽相薄爲雷激揚爲電上者就下流
水就通而合於青海壯土之氣御于赤天赤天七

百歲生赤丹赤丹七百歲生赤頰赤頰七百歲生
赤金赤金千歲生赤龍赤龍入藏生赤泉赤泉之
埃上爲赤雲陰陽相薄爲雷激揚爲電上者就下
流水就通而合於赤海弱土之氣御于白天白天
九百歲生白譽白譽九百歲生白頰白頰九百歲
生白金白金千歲生白龍白龍入藏生白泉白泉
之埃上爲白雲陰陽相薄爲雷激揚爲電上者就
下流水就通而合於白海牝土之氣御于玄天玄
天六百歲生玄砥玄砥六百歲生玄頰玄頰六百
歲生玄金玄金千歲生玄龍玄龍入藏生玄泉玄
泉之埃上爲玄雲陰陽相薄爲雷激揚爲電上者
就下流水就通而合於玄海

淮南子卷八終

淮南子卷九

漢劉向校定許慎記上明昆陵後學吳仲文刊

時則訓上

孟春之月招搖指寅昏參中日尾中其位東方其
日甲乙盛德在木其蟲鱗其音角律中大簇其數
八其味酸其臭羶其祀戶祭先脾東風解凍蟄蟲
始振蘇魚上負冰獺祭魚候鴈北天子衣青衣乘
蒼龍服蒼玉建青旗食麥與羊服八風水爨其燧
火東宮御女青色衣青采鼓琴瑟其兵矛其畜羊
朝于青陽左个以出春令布德施惠行慶賞省徭

賦立春之日天子親率三公九卿大夫以迎歲于東郊修除祠位幣禱鬼神犧牲用牡禁伐木毋覆巢殺胎夭麇毋卵毋聚衆置城郭掩骼埋醜孟春行夏令則風雨不時草木早落國有恐行秋令則其民大疫飄風暴雨總至黎莠蓬蒿並興行冬令則水潦爲敗雨霜大雹首稼不入正月官司司空其樹楊仲春之月招搖指卯昏弧中旦建星中其位東方其日甲乙其蟲鱗其音角律中夾鍾其數八其味酸其臭羶其祀戶祭先脾始雨水桃李始華蒼庚鳴鷹化爲鳩天子衣青衣乘蒼龍服蒼王建

青旗食麥與羊服八風水饗其燧火東宮御女青色衣青采鼓琴瑟其兵矛其畜朝于青陽太廟命有司省囹圄去桎梏毋笞掠止獄訟養幼小存孤獨以通句萌擇元日令民社是月也日夜分雷始發聲蟄蟲咸動蘇先雷三日振鐸以兆民曰雷且市同度量鈞衡石角斗稱端權槩毋竭川澤毋漦陂池毋焚山林毋作大事以妨農功祭不用犧牲用圭璧更皮幣仲春行秋令則其國大水寒氣總至寇戎來征行冬令則陽氣不勝麥乃不熟民多

相殘行夏令則其國大旱煖氣早來蟲螟爲害二月官倉其樹杏季春之月招搖指辰昏七星中旦牽牛中其位東方其日甲乙其蟲鱗其音角律中姑洗其數八其味酸其臭羶其祀戶祭先脾桐始華田鼠化爲鴛虹始見萍始生天子衣青衣乘蒼龍服蒼玉建青旗食麥與羊服八風水爨其燧火東宮御女青色衣青采鼓琴瑟其兵矛其畜羊朝于青陽右个舟牧覆舟五覆五反乃言具于天子天子鳥始乘舟薦鮪於寢廟乃爲麥祈實是月也生氣方盛陽氣發泄句者畢出萌者盡達不可以

內天子命有司發困倉助貧窮振乏絕開府庫出幣帛使諸侯聘名士禮賢者命司空時雨將降下水上騰循行國邑周視原野修利提防導通溝瀆達路除道從國始至境止田獵畢弋且罾羅罟餒毒之藥毋出九門乃禁野虞毋伐桑柘鳴鳩奮其羽載鸞降于桑具撲曲管篴后妃齋戒東鄉親桑省婦使勸蠶事命五庫令百工審金鐵皮革筋角箭幹脂膠丹漆無有不良擇下旬吉日大合樂致歡任少合牦牛騰馬游牝于牧令國讎九門礫攘以畢春氣行是月令甘雨至三旬季春行冬令則

寒氣時發草木皆肅國有大恐行夏令則民多疾
疫時雨不降山陵不登行秋令則天多沈陰淫雨
早降兵革並起三月官鄉其樹李

孟夏之月招搖指巳昏冀中日發女中其位南其
日丙丁盛德在火其蟲羽其音徵律中仲呂其數
七其味苦其臭焦其祀竈祭先肺螻蝻鳴丘蟪出
王瓜生苦菜秀天子衣赤衣乘赤騮服赤玉建赤
旗食菽與鷄服八風水爨柶燧火南宮御女赤色
衣赤采吹竽笙其兵戟其畜鷄朝于明堂左个以
出夏令立夏之日天子親率三公九卿大夫以迎

歲於南郊還乃賞賜封諸侯修禮樂饗左右命太
尉贊傑俊選賢良舉孝悌行爵出祿佐天長養繼
修增高無有墮壞毋興土功毋伐大樹令野虞行
田原勸農事驅獸畜勿令害穀天子以蔬嘗麥先
薦寢廟聚畜百藥靡草死麥秋至決小罪斷薄刑
孟夏行秋令則苦雨數來五穀不滋四隣入保行
冬令則草木早枯後乃大水敗壞城郭行春令則
螽蝗爲敗暴風來格秀草不實四月官田其樹桃
仲夏之月招搖指午昏亢中旦危中其位南其日
丙丁其蟲羽其音徵律中蕤賓其數七其味苦其

臭焦其祀竈祭先肺小暑至螳螂生鴈始鳴反舌
無聲天子衣赤衣乘赤騮服赤玉載赤旗食菽與
雞服八風水爨柘燧火南宮御女赤色衣赤采吹
竽笙其兵戟其畜雞朝于明堂太廟命樂師修鞀
鼗琴瑟管簫調竽箎飾鍾聲執干戚戈羽命有司
爲民祈祀山川百原大雩帝用盛樂天子以雉嘗
黍羞以含桃先薦寢廟禁民無刈藍以染毋燒灰
毋暴布門閭無閉關市無索挺重囚益其食存鰥
寡振死事游牝別其群執騰駒班馬政日短至陰
陽爭死生分君子齋戒慎身無躁節聲色薄滋味

百官靜事無徑以定晏陰之所成鹿角解蟬始鳴半夏生
木董禁民無發火可以居高明遠眺望登丘陵處臺榭
仲夏行冬令則雹霰散傷穀道路不通暴兵來至行春令
則五穀不熟百勝時起其國乃饑行秋令則草木零落
果實蚤成民殃於疫五月官相樹榆季夏之月招搖指
未昏心中日奎中其位中央其日戊己盛德在土其蟲羸
其音宮律中百鍾其數五其味甘其臭香其祀中霤祭
先心涼風始至蟋蟀居奧鷹乃學習腐草化爲蚘天
子衣苑黃乘黃騮服黃玉建黃旗食稷與牛服八風水
爨柘燧火中宮御女黃色衣黃采其兵劍其畜牛朝

于中宮乃命漁人伐蛟取鼉登龜取鼈令滂入材葦命
四監大夫令百縣之秩芻以養犧牲以共皇天上帝名矣
川四方之神宗廟社稷爲民祈福行惠令弔死問疾存
視長老行稭粥南厚席蓐以送萬物歸也命婦官染采
黼黻文章青黃白黑莫不質良以給宗廟之服必宣
以明是月也樹木方成勿敢斬伐不可以合諸侯起土功
動衆興兵必有天殃土潤溽暑大雨時行利以殺草糞
田疇以肥土壤季夏行春令則穀實解落多風欬民
乃遷徙行秋令則丘隰水潦稼穡不熟乃多女災行
冬令則風寒不時鷹隼蚤執四鄙入保六月官以內

其樹梓

淮南子卷之終

淮南子卷十

漢劉向校定許慎記上明毘陵後學吳仲校刊

時則訓下

孟秋之月招搖指申昏斗中旦畢中其位西方其
日庚辛盛德在金其蟲毛其音商律中夷則其數
九其味辛其臭腥其祀門祭先肝涼風至白露降
寒蟬鳴鷹乃祭鳥用始行戮天子衣白衣乘白駱
服白玉建白旗食麻與大服八風水爨柘燧火西
宮御女白色衣白采撞白鐘其兵戈其畜狗朝于
總章左个以出秋令求不孝不悌戮暴傲悍而罰

之以助損氣立秋之日天子親率三公九卿大夫以迎秋于西郊還乃賞軍率武人於朝命將率選卒厲兵簡練桀俊專任有功以征不義詰誅暴慢順彼四方命有司修法制繕囹圄禁姦塞邪審決獄平詞訟天地始肅不可以羸是月農始升穀天子嘗新先薦寢廟命百官始收歛完隄防謹障塞以備水潦修城郭繕宮室毋以封侯立太官行重幣出大使行是月令涼風至三旬孟秋行冬令則陰氣大勝介蟲敗穀戎兵乃來行春令則其國乃旱陽氣復還五穀無實行夏令則冬多火災寒暑

不節民多瘡疾七月官庫其樹棟仲秋之月招搖指酉昏牽牛中旦觜雋中其位西方其日庚辛其蟲毛其音商律中南呂其數九其味辛其臭腥其祀門祭先肝涼風至候鴈來玄鳥歸群鳥翔天子衣白衣乘白駱服白玉建白旗食麻與犬服八風水爨柘燧火西宮御女白色衣白采撞白鐘其兵戈其畜大朝于總章太廟命有司申嚴百刑斬殺必當無或枉撓決獄不當反受其殃是月也養長老授几杖行桴鬻飲食乃命宰祝行犧牲案芻豢視肥臞全粹察物色課比類量大小視少長莫不

中度天子乃儺以御秋氣以犬掌麻先薦寢廟是月可以築城郭建都邑穿竇塞修困倉乃命有司趣民收斂畜采多積聚勸種宿麥若或失時行罪無疑是月也雷始收聲蟄蟲培戶殺氣浸盛陽氣日衰水始涸日夜分一度量平權衡正鈞石角斗稱理關市來商旅入貨財以便民事四方來集遠方皆至財物不匱上無乏用百事乃遂仲秋行春令則秋雨不降草木生榮國有大恐行夏令則其國乃旱蟄蟲不藏五穀皆復生行冬令則風災數起收雷先行草木早死八月官尉其樹柘季秋之

月招搖指戌昏虛中旦柳中其位西方其日庚辛其蟲毛其音商律中無射其數九其味辛其臭腥其祀門祭先肝候鴈來賓雀入大水爲蛤菊有黃華豺乃祭獸戮禽天子衣白衣乘白駱服白玉建白旗食麻與犬服八風水爨柘燧火西宮御女白色衣白米撞白鐘其兵戈其畜犬朝于總章右个命有司申嚴號令百官貴賤無不務入以會天地之藏無有宣出乃命冢宰農事備收舉五穀之要藏帝籍之收於神倉是月也霜始降百工休乃命有司曰寒氣總至民力不堪其皆入室上丁入學

習吹大饗帝嘗犧牲合諸侯制百縣爲來歲受朔
日與諸侯所稅於民輕重之法貢職之數以遠近
地里所宜爲度乃教於田獵以習五戎命太僕及
七駟咸駕戴荏授車以級皆正設于屏外司徒搢
朴北嚮以贊之天子乃厲服廣飾執弓操矢以獵
命主祠祭禽四方是月草木黃落乃伐薪爲炭蟄
蟲咸俛乃趨獄刑毋留有罪收祿秩之不當供養
之不宜者通路除道從境始至國而后已是月天
子乃以犬嘗麻先薦寢廟季秋行夏令則其國大
水冬藏殃敗民多軌室行冬令則國多盜賊邊境
不寧土地分裂行春令則燠風來至民氣解隋師
旅並興九月官候其樹槐

孟冬之月招搖指亥昏危中旦七星中其位北方
其日壬癸盛德在水其蟲介其音羽律中應鍾其
數六其味鹹其臭腐其祀井祭先腎水始冰地始
凍雉入大水爲蜃虹藏不見天子衣黑衣乘玄驪
服玄玉建玄旗食黍與彘服八風水爨松燧火北
宮御女黑色衣黑采擊石磬其兵鍛其畜彘朝于
玄堂左个以出冬令命有司修群禁禁外徒閉門
閭大按客斷罰刑殺當罪阿上亂法者誅立冬之

日天子親率三公九卿大夫以迎歲于北郊還乃
賞死事存孤寡是月命太祝禱祀神位占龜策審
卦兆以察吉凶於是天子始裘命百官謹蓋藏命
司徒行積聚修城郭警門閭修棧閉慎管籥固封
壘修邊境完要塞絕蹊徑飾喪紀審棺槨衣衾之
厚薄營丘隴之小大高庠使貴賤卑尊各有等級
是月也工師效功陳祭器案度呈堅致爲上工事
苦慢作爲淫巧必行其罪是月也大飲蒸天子祈
來年於天宗大禱祭于公社畢饗先祖勞農夫以
休息之命將率講武律射御角力勁乃命水虞漁
師收水泉池澤之賦毋或侵牟孟冬行春令則凍
地不密地氣發泄民多流亡行夏令則多暴風方
冬不寒蟄蟲復出行秋令則雪霜不時小兵時起
土地侵削十月官司馬其樹檀仲冬之月招搖指
子昏壁中旦軫中其位北方其日壬癸其蟲介其
音羽律中黃鍾其數六其味鹹其臭腐其祀井祭
先腎水益壯地始圻鳩鳴不鳴虎始交天子衣黑
衣乘鐵驪服玄玉建玄旗食黍與彘服八風水爨
松燧火北宮御女黑色衣黑采擊石磬其兵鍛其
畜彘朝于玄堂太廟命有司曰土事無作無發室

居及起大衆是謂發天地之藏諸蟄則死民必疾
疫有隨以喪急捕盜賊誅淫泆詐僞之人命曰暢
月命奄尹申宮令審門閭謹房室必重閉省婦事
乃命大酋秫稻必齊麴蘖必時湛熅必潔水泉必
香陶器必良火齊必得無有差忒天子乃命有司
祀四海大川名澤是月也農有不收藏積聚牛馬
畜獸有放失者取之不詰山林藪澤有能取䟽食
田獵禽獸者野虞教導之世有相侵奪罪之不赦
是月也日短至陰陽爭君子齋戒處必掩身欲靜
去聲色禁嗜欲寧身體安形性是月也荔挺出芸

始生丘蟪結麋角解水泉動則伐樹木取竹箭罷
官之無事器之無用者涂闕庭門閭築圉圉所以
助天地之閉仲冬行夏令則其國乃旱氛霧冥冥
雷乃發聲行秋令則其時雨水瓜瓠不成國有大
兵行春令則蟲螟爲敗水泉咸竭民多疾癘十一
月官都尉其樹棗季冬之月招搖指丑昏婁中旦
氏中其位北方其日壬癸其蟲介其音羽律中大
呂其數六其味鹹其臭腐其祀井祭先賢鴈北鄉
鵠加巢雉雉雞呼卯天子衣黑衣乘鐵驪服玄玉
建玄旗食麥與菹服八風水爨松燧火北宮御女

淮南子 卷之六 時則訓下 六
黑色衣黑采擊石磬其兵鍛其畜彘朝于玄堂右
个命有司大儻磔出土牛命漁師始漁天子親往
射漁先薦寢廟令民出五種令農計耦耕事修耒
耜具田噐命樂師大合吹而罷乃命四監收秩薪
以供寢廟及百祀之薪燎是月也日窮于次月窮
于紀星周于天歲將更始令靜農民無有所使天
子乃與公卿大夫飾國典論時令以待嗣歲之宜
乃命太史次諸侯之列賦之犧牲以供皇天上帝
社稷之芻享乃命同姓之國供寢廟之芻豢卿士
大夫至于庶民供山林名川之祀季冬行秋令則
白露早降介蟲為祆四鄙入保行春令則胎夭傷
國多痼疾命之曰逆行夏令則水潦敗國時雪不
降冰凍消釋十二月官獄其樹櫟

五位

東方之極有碣石山過朝鮮貫大人之國東至日
出之次搏木之地青之樹木之野太皞句芒之所
司者萬二千里其令曰槌群禁開閉闔通窮窒達
障塞行優游棄怨惡解役罪免憂患休罰刑開關
梁宣出財和外怨撫四方行柔惠止剛強南方之
極自北戶孫之外貫顓頊之國南至委火炎風之

野赤帝祝融之所司者萬二千里其令曰爵有德
賞有功惠賢良救饑渴舉力農賑貧窮惠孤寡憂
罷疾出大祿行大賞起毀宗立無後封建侯立賢
輔中央之極自崑崙東絕兩恒山日月之所道江
漢之所出衆民之野五穀之宜龍門河濟相貫以
息壤堙洪水之州東至於碣石黃帝后土之所司
者萬二千里其令曰平而不阿明而不苛包裹覆
露無不囊括溥汎無私正靜以和行桴鬻養老衰
弔死問疾以送萬物之歸西方之極自崑崙絕流
沙沈羽西至三危之國石城金室飲氣之民不死

之野少皞蓐收之所司者萬二千里其令曰審用
法誅必罪備盜賊禁姦邪飾群收謹貯聚收城郭
補決竇塞蹊徑遏溝瀆止流水雖谿谷守門閭陳
兵甲選百官誅不法北方之極自九澤窮夏晦之
極北至今正之谷有凍寒積水雪霜霰霰漂潤群
水之野顓頊玄冥之所司者萬二千里其令曰申
群禁固閉藏修障塞繕關梁禁外徒斷罰刑殺當
罪閉關閭大按客止交游禁夜樂蚤閉宴開以塞
姦人已德執之必固天節已幾刑殺無赦雖有盛
尊之親斷以法度毋行水毋發藏毋釋罪

六合

孟春與孟秋爲合仲春與仲秋爲合季春與季秋
爲合孟夏與孟冬爲合仲夏與仲冬爲合季夏與
季冬爲合孟春始嬴孟秋始縮仲春始出仲秋始
內季春大出季秋大內孟夏始緩孟冬始急仲夏
至修仲冬至短季夏德畢季冬刑畢故正月失政
七月涼風不至二月失政八月雷不藏三月失政
九月霜不降四月失政十月不凍五月失政十一
月蟄蟲冬出其鄉六月失政十二月草木不脫七
月失政正月大寒不解八月失政二月雷不發九
月失政三月春風不濟十月失政四月草木不實
十一月失政五月下雹霜十二月失政六月五穀
疾狂春行夏令泄行秋令水行冬令肅夏行春令
風行秋令蕪行冬令格秋行夏令華行春令榮行
冬令耗冬行春令泄行夏令旱行秋令霧

製度

陰陽大制有六度天爲繩地爲準春爲規夏爲衡
秋爲矩冬爲權繩者所以繩萬物也準者所以準
萬物也規者所以員萬物也衡者所以平萬物也
矩者所以方萬物也權者所以權萬物也繩之爲

度也直而不爭修而不窮久而不弊遠而不忘與
天合德與神合明所欲則得所惡則亡自古及今
不可移匡厥德孔密廣大以容是故上帝以爲物
宗準之爲度也平而不險均而不阿廣大以容寬
裕以和柔而不剛銳而不挫流而不滯易而不穢
發通而有紀周密而不泄準平而不失萬物皆平
平無險謀怨惡不生是故上帝以爲物平規之爲
度也轉而不復負而不垓優而不縱廣大以寬感
動有理發通有紀優優簡簡百怨不起規度不失
生氣乃理衡之爲度也緩而不後平而不怨施而

不德弔而不責常平民祿以繼不足教教陽陽唯
德是行養長化育萬物蕃昌以成五穀以實封疆
其政不失天地乃明矩之爲度也肅而不悖剛而
不憤取而無怨內而無害威厲而不懼令行而不
廢殺伐既得仇敵乃克矩正不失百誅乃服權之
爲度也急而不羸殺而不割充滿以實周密而不
泄敗物而弗取罪殺而不赦誠信以必堅慤以固
糞除苛慝不可以曲故冬正將行必弱以強必柔
以剛權正而不尖萬物乃藏明堂之制靜而法準
動而發繩春治以規秋治以矩冬治以權夏治以

淮南子卷十終
衡是故燥濕寒暑以節至其雨膏露以時降

淮南子卷十終

